



5. marts 2010
5. august 2009

UPA 2010/23
UKA2009/57

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Inimik attartornermi peqqussummut atuuttumut allannguutissaannik kingusinnerpaamik 2010-mi upernaakkut Inatsisartut ataatsimiinneranni Naalakkersuisut saqqummeeqqullugit Inatsisartut aalajangiiffigisassaattut siunnersuut, tamatuma kingorna qaammammut ineqarnermut akiliutaasartunut ineqarnermut meeqqanut tapiissuteqartoqartassaaq meeqamut ataatsimut 18-it inorlugit ukiulimmut angerlarsimaffimmi najugalimmut 7,5 % -imik ineqarnermi qaammammut akiliutinut ilanngaataasartumik, taamaattorli meeqqat amerlanerpaamik arfiniliussallutik.

(Siumup Inatsisartuni ilaasortaataitai)

Tunngavilersuut:

Ilaqutariit tamarmik inuiaqatigiinni qitiupput. Ilaqutariit aamma aningaasaqarniarnikkut pitsaasumik tunngavissinneqartariaqarput meeqqat inuunermi aallartilluarsinnaaqullugit, tamannalu piviusunngortinneqartariaqarpoq Inatsisartut, Naalakkersuisut, kommunit, kattuffiit, angajoqqaat susasaqartullu tamaasa suleqatigiissillugit.

Ilaqutariit meerartallit atugarisaasa pitsaanerulersinnissaat siunertaralugu Siumut ilungersuuteqartuarpoq. Siumumiit anguniarparput ilaqutariit meerartallit aningaasartuutikillisaaviginissaat, taamaammat Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup kapitali 4-aanni § 28-imut immikkoortut nutaatut ilanngunneqartussamik maannakkut saqqummiussivugut, imatullu naleqqussarneqarsinnaasumik oqaasertalerneqarnissaa siunnersuutigalutigu;

“Imm.xx Attartortumut qaammammut akiliutissat akiligassanngortinneqarnerini meeqqanut 18-it inorlugit ukiulinnut angerlarsimaffimmi najugaqartunut, inuit allattorsimaffianni nalunaarsorsimasunik qitornalimmut akiliutissanut tapiissuteqartoqartassaaq, attartortup imm. 1 naapertorlugu akiliutai appartinneqassapput. Meeqqamut ataatsimut, amerlanerpaamilli meeqqanut arfinilinnut attartortup § 28, imm. 1, 2 imaluunniit 3 naapertorlugu qaammammut akiliutai, akiliutit 7,5 procentiinik appartinneqassapput.

Imm.xx. Attartortoq pisussaavoq meeraq akiliutinut appaanermut tunngaviusoq angerlarsimaffimmi najugaqartutut inuit allattorsimaffianni nalunaarsorsimajunnaarpat tamanna attartortitsisunut nalunaarutigissallugu”.

Ilanngullugu siunnersuutigaarput taamatut aaqqiinermut Namminersorlutik oqartussaniit aningaasartuutaanerusussat ineqarnermut tapiissuteqartarnermi aningaasaliissutaasartut naleqqussaavigineqarnerisigut aningaasalersorneqassasut.

Taamatut oqaaseqarluta siunnersuutip tamanit ilassilluarneqarnissaa neriuutigaarput.